

明

史

明史卷一百

志七十四

食貨六

倉庫

賈子曰積貯者天下之大命也有明積貯之法視前代爲備初京衛有軍儲倉洪武三年增置二十所自一至二十以次名建臨濠倉復置倉臨清爲轉運十四年命京衛建倉時各路及邊境多儲糧所在有倉已衛所屯田收入貯倉以自給若官俸咸取焉又於州縣設預備倉東西南北四所各就村聚建設遺耆民運鈔貿米實之以備凶荒有司官吏月俸儲各府

倉自鈔法行頗省革二十四年儲糧一十六萬石於
臨清以給訓練騎兵二十八年置皇城長安東安西
安北安四門倉儲糧給守禦軍士京師諸衛四十一
倉曰錦衣衛烏龍潭倉曰旗手金吾前後羽林左右
虎賁左右驍騎右龍驤神策鷹揚留守中前後左右
興武豹韜府軍府軍左右後龍虎武德和陽鎮南瀋
陽左右孝陵廣洋天策江陰水軍左右應天橫海龍
江左右龍虎左豹韜左諸衛倉又飛熊廣武英武諸
衛亦有倉賜諸王倉庫名設北平密雲諸縣倉儲糧
以資北征初洪武二十七年北平宣府居庸關軍儲

倉成凡六百區永樂二年帝在北平以海運糧船所
抵置直沽倉明年置天津露囤五年設通州左衛建
倉以貯淮安河南漕粟七年設北京金吾左右羽林
前常山左右中燕山左右前濟陽濟川大興左武成
中左右前後義勇中左右前後神武左右前後忠義
左右前後武功中寬河會州大寧前中富谷蔚州三
十七衛錦衣中懷來守禦二千戶所倉通州衛倉是
時益令天下郡縣多設倉儲太祖時預備倉之在四
鄉者移之城內十三年會通河成始爲轉運轉運者
於徐淮臨德設倉分貯民運漕糧令官軍支運赴通

州轉運入京者也臨清倉設自洪武至是設淮安府
常盈倉徐州廣運倉德州廣積倉既又移德州廣積
倉於臨清之永清壩設武清衛倉於河西務設通州
衛通濟倉於張家灣宣德五年移置濟川衛舊倉在
平則門者於新太倉增造臨清廣積倉度可容三百
萬石增置北京及通州倉明年增置北京在城倉英
宗初命廷臣集議天下司府州縣有倉者以衛所倉
屬之無倉者以衛所倉改隸之惟遼東甘肅寧夏萬
全沿海衛所無府州縣者仍其舊正統三年增置府
軍左右金吾前三衛京倉五年增設羽林右府軍後

虎賁左金吾後四衛京倉改東直門西庫爲燕山衛倉自長運法行轉搬諸倉皆虛而京通倉不足帝乃命毀臨清德州河西務倉三分之一改爲京通倉建獻陵及府軍忠義諸衛倉又築倉於居賢崇教二坊草塲景泰初移直隸武清衛諸倉於通州大運西倉廢殿舊址天順時通州新城增置倉廩三百間成化初廢臨清德州預備倉之在城外者而以城內空廩儲預備米名臨清者曰常盈德州者曰常豐正德元年以邊警廷臣議築通州新城保障糧儲嘉靖四十年詔于張家灣新城置倉京倉凡五十有六皇城

門四倉制如南京舊太倉十一衛曰獻陵景陵昭陵
羽林前忠義前後義勇右蔚州左太寧中錦衣神武
左設自永樂年新太倉七衛曰裕陵茂陵康陵義勇
前大寧前富谷會州設自宣德年海運倉六衛曰秦
陵永陵忠義右寬河燕山左義勇後宣德即舊海子
設南新倉八衛曰府軍燕山右彭城龍驤龍虎永清
右金吾左濟川亦設自永樂年北新倉五衛曰府軍
左右前燕山前金吾前正統年設大軍倉四衛曰永
清左旗手大軍武成中濟陽倉二衛曰金吾右濟陽
皆永樂年設祿米倉二衛曰彭城南新府軍前嘉靖

時令改彭城府軍二倉之半爲祿米倉外東倉爲衛倉內西倉爲部倉西新太倉四衛曰虎賁左金吾後府軍後羽林左正統元年設太平倉二衛曰留守前後弘治中設正德八年改鎮國府十六年復大興倉一衛曰大興左永樂間設通州倉凡一十有六大運西倉六衛曰通州通州左右定邊神武中武清大運南倉四衛曰通州通州左右神武中定邊大運東倉一衛曰神武中俱設自永樂天順年東倉廢歸併中倉水次倉凡五天津左右三倉永樂年設德州常豐二倉宣德年設臨清廣積常盈三倉永樂年設徐州

永福廣運二倉永福設自洪武廣運設自永樂淮安
一倉永樂年設其直隸布政司諸府州縣藩府邊隘
堡站衛所屯戍之處皆有倉少者一二多者二三十
兩京庫藏先後建設其制大畧相同內承運庫收貯
緞疋黃生素綾紗羅紵綵閃色織金錦羊絨纓金珠
玉帶玉塊瑪瑙珊瑚寶石象牙之類而金花銀爲最
大歲進一百萬有奇即明初折糧銀也內府司鑰庫
亦名天財庫收貯錢鈔諸門鑰鑰內府供用庫收貯
黃白蠟諸香芽葉茶白熟糙粳糯米等甲字庫收貯
三梭棉苧布水銀銀珠黃丹綠明礬光粉黑鉛水膠

白芨茜草藍靛槐紅花烏梅五倍子諸色顏料乙字
庫收貯綵綿布胖襖衿鞵毛襖狐帽素本藥榜中夾
諸紙丙字庫收貯五綵綿合羅綵串五綵荒綵棉花
絨等丁字庫收貯紅黃熟銅建鐵錫鉄線魚線膠牛
角筋皮鹿皮翎毛黃蠟漆油白蔴麻白圓藤蘇木等
戊字庫收貯弓箭弦條盔甲軍器廢鐵胡椒等承運
庫收貯潤生絹翠毛皮等廣盈庫收貯綵紗羅綾錦
綢絹布若抄沒違禁物外國貢物廣惠庫收貯錢鈔
絲織梳櫛物廣積庫收貯紵綵綾羅硫黃焰硝等賊
罰庫收貯外解錢鈔紵綵綾羅綢絹氈氈棉布衣服

花絨鐵刀各沒官物皆謂內庫屬戶部惟乙字庫屬
兵部戊字廣積廣盈庫屬工部甲字以下十庫二租
時止五庫後增爲十也內府諸監司局神樂堂犧牲
所太常光祿寺國子監各以所掌收貯應用諸色凡
府州縣稅課司局河泊所歲辦商稅魚課并引由契
本件項課程太祖令自辦課所司解州縣府司以至
部部劄之庫驗中給進狀寄庫月逢九會巡視庫藏
科道官進庫驗收戊字庫廩甲等各衛所軍器月一
次會巡視廠庫科道官進庫驗收有不堪者駁易明
初貯銀無專庫時歲額征米麥綵絹錢鈔諸本色不

征金銀惟坑冶諸稅課有銀太祖置行用四庫于聚
寶募府儀鳳門會同橋及在外府州市之民間仁宗
立罷市革行用庫弘治時置南京戶部銀庫正統四
年新建天財甲乙丙丁諸庫成戶部言甲字諸庫先
設在外今移入內府解納宜于六科給勘合填數進
交七年始置戶部太倉庫十年設通州通濟庫嘉靖
市二年革世宗時命應鮮內府銀並貯太倉庫備邊
用餘鹽銀解太倉另貯一庫專備各邊客兵糧草修
工部舊庫名節慎庫隆慶初密薊昌平諸鎮建庫收
貯主客年例軍門公費及撫彘修邊銀而內府諸庫

監收內臣橫索無厭正德時台州衛指揮陳良進納軍器至稽留八載乞食于市世宗立以戶部尚書孫交言詔京通二倉水次倉皇城九門馬房倉塲皇莊內諸臣凡正德年添注者悉取回鄭村壩等十九馬房大壩把總內官止留老練謹慎者十名然是時李宣王奉李慎等猶夤緣提督京通倉徐淮臨德倉亦漸復用嘉靖十四年給事中管懷理始論罷之先是弘治時內府供應繁多太倉銀始收入內庫武宗臨御內承運庫數奏內府財用不足請支太倉銀戶部數執奏不允嘉靖初年內府供應大略同弘治時二

十年以後率倍之矣三十七年令歲進內庫銀一百萬兩外加預備欽取銀後又取沒官銀四十萬兩入內庫隆慶三年詔取太倉銀三十萬兩言官交章諫止有詔且取十萬兩明年內承運庫復以空劄下戶部取銀十萬兩部科爭之未久又詔取十萬兩廷臣疏諫皆不聽既又取光祿取太僕無歲不進工部尚書朱衡言朝廷供應皆民脂膏宮中府中當屬一體往時錢糧解進以科道臣兼督用意良深乃以此爲防監局守催猶有唾罵大司空而不忌者且一礦金至則曰着內庫進收一稅金至則曰着內庫進收非

真歸內庫也實歸東裕庫也夜光之珠照耀宮寢貓
睛寶磔充牝皇居若羨餘若折乾若抄沒若孝順若
緜壁陳設種積殊稱何可勝計即以三十年金花計
之不下數千萬况天產地生滙而鬱於其中即巧曆
不能測者乎內供歲額金花銀一百萬兩之外買辦
二十萬兩始於萬曆之六年後遂沿爲定制又內操
馬三千匹歲加芻料銀七萬餘兩額外括取太倉光
祿太僕銀幾盡凡京師積貯曰太倉漕糧太倉銀庫
老庫皆戶部掌之馬價則歸太僕內供則歸光祿自
餘若承運庫司鑰供用甲字諸庫掌之內臣皆爲內

庫爲天子私財太倉漕糧者歲漕東南米四百萬石以給京師者也入京倉者十五六入通倉者十三入天津蘄遠密雲昌平倉者十一二太倉銀庫者受天下麥米諸折色與鹽餉諸銀所委輸四百五十餘萬以備內供以給官府以餽邊餉以充百用者也始時財賦充盈十庫積銀八百餘萬續取銀兩貯兩廡便支發爲外庫而中庫所藏不動遂爲老庫至嘉靖後老庫存積止一百二十萬矣太僕寺原積馬價九百餘萬祖宗累世扃蓄以戒不虞者也光祿寺職司大內膳羞者也內庫曰內承運庫曰內府司鑰庫曰內

府供用庫內承運庫在宮內者爲內東裕庫爲寶藏
庫皆謂裏庫其會極門寶善門迤東及南城磁器諸
庫則謂之外庫甲乙丙丁戊五字庫及承運廣盈廣
惠廣積贓罰諸庫總謂之十庫已者已也故自己以
下不以十千名焉內帑積金凡十窖累朝儲備邊虞
景泰末賞賚頗濫英宗居城南閣之嘆曰累世之積
其盡乎甫復位輒往觀之則金具存止缺其一角旋
節他費補之及成化中太監梁芳常興等作竒技淫
巧禱祠宮觀寶石之事興於是十窖俱罄帝一日指
示芳等帑藏之空皆爾二人爲之興惶懼不敢對芳

仰言曰臣爲陛下造齊天之福何爲虛費帝不悅起
曰後之人必有與汝計者祖宗時天下府庫各有存
積邊餉未嘗借支于內京師未嘗收括于外蓋不加
賦而用足也成化時巡鹽御史楊澄始請發各鹽運
司提舉司贓罰銀入京師庫弘治時給事中曾昂請
以諸布政司公帑積貯征徭羨銀盡輸太倉尚書周
經力爭之以爲非藏富於民之意至劉瑾用事遂令
各省庫藏盡輸京師世宗時以閩廣進羨餘戶部請
責他省巡按歲一奏獻如例又以太倉庫道運南戶
部庫銀八十萬兩實之隆慶初遣四御史分行天下

括府庫財歸太倉至天啓中用操江范濟世之策下
勅督促收括靡留遺矣預備倉積糧弘治三年隄州
縣十里以上積一萬五千石二十里積二萬石考滿
且計其多寡以爲殿最蓋自太祖令耆民賣鈔糶米
儲預備四倉天下州縣靡不儲蓄充裕建後漸以廢
弛周忱撫南畿立濟農倉于謙撫河南山西修預備
之政儲積有方給散有序民甚賴之是時楊一清請
遣官督有司出庫銀平糶貯備帝乃詔能出粟佐官
者授以散官旌其門後許入贖囚米于倉未有定數
也成化後始有里積三百石五百石之令不及數者

猶未有罰例也至是乃定不及三分若五分者奪俸
過半者降用之例又立四門社倉歉散豐歛如洪武
制江西巡撫林俊奏立常平倉秋糶春糶常除什一
以備耗數更勸社民立義倉嘉靖二十四年給事中
胡叔廉奏減其半四十三年以直隸巡按宋纁言又
減半隆慶四年更定十里以下歲積穀千石百里以
下二千五百石二百里以下三千石即劇郡無過五
六千石自後爲數日減神宗屢下詔勅行惟閩撫金
學曾設立常平義倉義廩行之最力其他率以具文
欺罔云馬房倉塲在南京者爲中軍都督府爲中和

橋爲金川門爲清涼門皆馬草場錦衣衛爲通濟門
馬草場象草場在北京者有御馬三倉壩上二十馬
倉屬通州曰壩上倉壩上東馬房倉壩上南倉金盞
兒甸倉北高倉義河倉湖梁馬房倉壩上北倉黃土
倉鄭家莊馬房倉湯山草場倉北草場倉渾石橋倉
渾石橋南倉峪口張家莊馬房倉南石渠倉南石渠
西峪口官莊馬房倉峪口楊家橋馬房倉又四馬房
屬宛平者二曰鄭村壩大馬房北高馬房屬大興者
二曰壩大馬房駒子馬房馴象千戶所內象房倉外
象房倉東直門內外牛房牛房倉德勝門內吳家駝

黃土牛房五處吳家駝牛房倉冷泉羊房景泰間移於西琉璃窯廠德勝門內羊房御馬監三場曰稟草欄草場在皇城門之東永樂年建倉至宣德年分受中府草場始生草場曰中府草場創自永樂年即舊都府草場在東安門內曰天師菴草場在皇城外之東北創自正統年在京濟陽等三十四衛草場歲採秋習以飼官馬宣德八年侍郎王佐請并爲居賢坊等三場大興左等衛併爲鳴河坊一場其後爲安仁坊五草場曰安仁坊草場北新草場明智坊草場皆創自正統十四年西城草場臺基廠草場共五也在

外者通州馬房上場六薊州馬房下場五玉田縣馬房下場三寶坻縣馬房下場一十有一昌平州馬房上場六順義縣馬房上場四玉河縣馬房上場六香河縣馬房下場二滹縣馬房一武清縣馬房下場一十有一東安縣馬房下場二宣德四年論行在戶部曰京師通州各衛倉場象馬牛羊等房收支糧芻官攢受賕虛出實收貧者則收本色加以拷掠數倍苛索宜嚴禁止嘉靖七年給事中陸粲覈實壩上等牛馬羊房見在頭畜共三千九百七十七歲應用料莖三萬九千三百十五石有奇草九十萬一千五百八

十四束比之原數減料十四萬二千餘草四百六萬
一千餘

明史卷一百一

食貨七

鹽法

志七十五

管子曰海王之國謹正其鹽筴故煮海之利歷世皆領于縣官明有天下產鹽之地置都轉運鹽使司六曰兩淮曰兩浙曰長蘆曰山東曰福建曰河東鹽課提舉司七曰廣東曰海北曰四川曰雲南黑鹽井白鹽井安寧鹽井王井陘西鹽課司一兩淮鹽場三十洪武時歲辦鹽三十五萬二千五百七十六引一百斤有奇弘治時改辦小引鹽七十萬五千一百八十

引萬曆六年歲辦小引鹽司鹽行直隸之應天寧國
太平揚州鳳陽廬州安慶池州淮安九府滁和二州
江西之南昌九江南康建昌廣信贛州南安臨江撫
州吉安袁州瑞州饒州十三府贛州南安吉安後改
行廣鹽湖廣之武昌黃州漢陽岳州荊州永州常德
長沙衡州德安辰州承天鄖陽襄陽寶慶十五府興
國沔陽靖三州河南之河南汝寧南陽三府陳州所
輸邊甘肅延綏寧夏宣府大同遼東固原山西神池
諸堡兩浙鹽場三十五洪武時歲辦鹽二十二萬四
百五十七引二百斤有奇弘治時改辦小引鹽四十

四萬四千七百六十九引一百四十九斤有奇萬曆
六年歲辦小引鹽同弘治鹽行浙江十一府直隸之
松江蘇州常州鎮江徽州五府廣德州江西之廣信
府所輸邊甘肅延綏寧夏固原山西神池諸堡明初
置北平河間鹽引司後改河間長蘆鹽場二十四洪
武時歲辦鹽六萬三千一百五十三引三百斤有奇
弘治時改辦小引鹽一十八萬八百七引一百八十
八斤有奇萬曆六年歲辦小引鹽視弘治增一引減
一百二斤北直隸八府二州河南之彰德衛輝二府
齊魯之所輸邊宣府大同薊州山東鹽場一十九洪

武時歲辦鹽一十四萬三千三百八十七引一百五十斤有奇弘治時改辦小引鹽二十八萬四千一百二十四引一百六十二斤鹽行山東六府直隸徐邳宿三州河南開封府後河南改食河東鹽所輸邊遼東山西神池諸堡福建所轄鹽場七洪武時歲辦鹽一十萬四千五百七十二引三百斤有奇引有曰附海白依山弘治間歲辦大引鹽視洪武增七百六十八引三十五斤有奇萬曆六年歲辦大引鹽視弘治時減一千引一斤鹽行境內河東所轄解鹽東西中場三洪武間歲辦鹽六千八十萬斤爲小引三十萬

四千弘治間歲辦鹽四十二萬引萬曆六年歲辦小
引鹽六十二萬引鹽行陝西之西安漢中延安鳳翔
四府河南之歸德懷慶河南汝寧南陽五府汝州山
西之平陽潞安二府澤沁遠三州地有兩鹽得兼行
陝西靈州大小鹽池又有漳縣鹽井西和縣鹽井洪
武間歲辦鹽西河一十三萬一千五百三十斤有奇
漳縣五十一萬五千六百七十斤有奇靈州二百八
十六萬七千四百七十七斤弘治間同洪武萬曆六年歲
辦鹽一千二百五十三萬七千六百六十八斤鹽行
陝西之鞏昌臨洮二府河州延安府舊行河東鹽陞

慶四年改屬廣東所轄鹽場一十四海北轄鹽場一
十五洪武間歲辦鹽廣東四萬六千八百五十五引
一百斤有奇海北二萬七千四十引二百斤有奇弘
治間歲辦鹽廣東同洪武海北一萬九千四百八十
三引四百九十斤萬曆六年歲辦廣東小引生鹽三
萬二百二十九引小引熟鹽三萬四千六百一引海
北小引正耗鹽一萬二千四百八十六引鹽有生有
熟熟資生賤廣東鹽行廣州肇慶惠州韶州南雄潮
州六府海北鹽行廣東之雷州高州廉州瓊州四府
湖廣之永州府桂陽郴二州廣西之桂林柳州梧州

潯州慶遠南寧平樂太平思明鎮安十府田龍泗城
奉議利五州江西之南安贛州吉安三府自淮改屬
四川所轄鹽井及鹽井衙黑白鹽井洪武間歲辦鹽
冊千一百一十二萬七千四百四十斤弘治間歲辦鹽二
冊一十七萬六千八百八十斤萬曆六年歲辦鹽總九百
八十八萬一千一百四十斤鹽行四川之成都敘州
順慶保寧夔州五府潼川嘉定廣安雅廣元五州縣
雲南黑鹽井白鹽井及安寧鹽井凡五洪武間歲辦
引鹽一萬七千八百七十引有奇爲鹽一百八十
二萬七千八百七十七斤弘治間歲額各井多寡不

一萬曆六年歲辨鹽同洪武鹽行境內凡鹽所產不
同有刮地而得者有風水而成者有熬波而出者有
汲井而爲者有積鹵而結者寧夏之鹽刮地而得解
州之鹽風水而成淮浙之鹽熬波而出川滇之鹽汲
井而爲閩粵之鹽積鹵而結淮南之鹽煎淮北之鹽
曬山東之鹽有煎有曬商人歲辦鹽官給之引諸所
關中懸令召商納粟中已給引日詣鹽場支鹽如日
割沒其餘鹽其引與鹽離者同私鹽追斷商鬻有定
所無敢踰境僞造引者罪至死淮浙每引四百斤後
分一引爲二引而以四百斤者爲大引二百斤者爲

小引名曰改辦小引鹽山東北平河間靈州廣東海
北引四百斤河東引二百斤洪武三年始召商納米
大同倉一石太原倉一石三斗與淮鹽一小引於時
所在議納米中鹽明鹽制實邊策也四年定中納淮
浙山東鹽例其後增減不一率視時緩急米直高下
中納者利否哀益之八年定中納廣西白石場廣東
東海場鹽例十二年罷天下鹽運司批驗所三十有
二明年兩浙運使呂本奏請增減各場竈民引額實
增一萬一千九百引戶部復欲計口徵太原大同二
府鹽米帝不從十五年以大軍南征兵食不繼定雲

南普安普定烏撒納米給鹽之例十七年定兩淮兩浙工本鈔引二貫五百文河間廣東海北山東福建四川引二貫十九年雲南布政司張統言金苗中納向聽以穀準米其後有司不許輸穀由是中納者少乞仍舊詔可之三十五年御史李謙言河東鹽池西屬解州東屬安邑歲辦鹽一十五萬二千引運司設安邑止於東池撈鹽而西池倍於東池請別設西塲于解州依原額加一倍量添人夫撈鹽帝從之兩浙運司言商人赴温州各塲支鹽必經涉海洋著令禁乘船入海非便詔兵部移文所司不得概禁太宗以

營建北京停天下中鹽徃歲所中鹽並令停支專於北平開中惟雲南金齒衛楚雄四川鹽井衛陝西甘肅衛開中如故七年設交趾提舉司四場鹽課司十二年御史蕭常言北京食鹽舊例驗口支給引納米五石無商人貨買今車駕數幸軍民轉集食鹽者多宜定爲常法乃命商於喜峰口倉納米引五斗支河間長蘆鹽就北京貨買是年以水災免北京行部所屬州縣戶口食鹽米兩年十四年尚書夏原吉言北京戶口食鹽僅足本處之用行在扈從官軍人衆宜令北京行部於長蘆鹽運司支運每鹽一斤收鈔一

貫初令御史巡鹽二十二年仁宗立以鈔法阻滯令就本處官司納鈔中鹽滄州鹽引三百貫河東山西半之福建浙東百貫宣德四年戶部尚書郭敦言近年中納項多鹽不給支請不依常例以十分爲率六分支與納米京城者四分支與遼東永平山海甘肅大同宣府萬全已納米者餘悉停止又言洪武中中鹽各商年久物故代支者多虛冒請按引償鈔十錠帝命倍給七年重擬邊境中鹽糧例時以邊臣各請召納故也正統三年寧夏總兵史昭始奏請納馬中鹽自中馬之令開邊儲告匱命直隸巡撫侍郎周忱

兼理松江分司鹽課分司故隸兩浙都轉運鹽使司
民訴官司處置失宜致鹽課逋負乞令忱兼理遂有
是命忱乃疏論竈丁逃竄負課六十餘萬宜官鑄鍋
給負鹽竈丁令戶下人口協鹽清人總催頭目選老
人分地巡緝私販又言煎鹽之人近場者曰鹵丁遠
場者曰竈丁鹵丁諳煎鹽而貧前代有贍鹽官田田
八畝辦鹽一引洪武初雖給耕種具起科納糧矣計
一府二縣竈丁歲運秋糧無慮五六萬石請得存留
免運省耗米貯場以贍鹵丁及煎補逃戶缺額又以
逋鹽六分之過年帶補一分帝皆從之五年給還半

遠候支鹽商本鈔時商人有自永樂中候支祖孫相代不得者乃議仿洪武中例引給鈔五十錠加十錠償之願守支者聽始定常股存積之數令兩淮兩浙長蘆運司歲額以十分爲率八分給守支商曰常股二分別爲收積在官曰存積遇邊方急缺糧儲召中以存積二分見鹽不次支給凡中常股價輕存積價重然人甚苦守支爭趨存積矣六年解州知州吳惠言古有東西二鹽池東池鹽場即今安邑縣潞村西池鹽場即今解州東關二州十縣鹽戶各就利便元至正十四年始移西場于潞村至今兩場并爲一處

鹽戶運負薪米失便西池地高水淺鹽尤易結勝東池令棄爲無用可惜乞立東塲於潞村西塲仍立於本州東關辦納各從民便命覈實行之于時復令人納草中鹽商人苦勢要冒中占納麤米越次支鹽詔御史察劾九年給事中鮑輝言浙江州縣籍記軍民計口月令納米三升買鹽一斤商賈持鹽赴官官爲歛散追徵之急過於租賦歲荒民貧饋粥不給豈能計口出米以代鹽哉奪貧民之食以益富商非所以卹民也矧鹽法不通由舟車輿販彼近塲小民背負芻米豈爲大害請一切更之報可十一年以山東諸

鹽場隸長蘆巡鹽御史十二年戶部奏官民食鹽鈔
隨地徵米徵鈔不同近奉詔書減半徵納其陝西山
西四川雲南貴州廣西皆供邊儲應存浙江江西福
建廣東湖廣應半解南京河南山東南直隸大名廣
平順德三府半解京師順天河間真定保定永平五
府隆慶保安二州鄉民輸米應存官吏市民徵鈔半
解京師又奏明年戶口食鹽順天應天徵米隆慶保
安州徵鈔陝西山西四川雲南貴州廣西米鈔並徵
俱存北直隸大名諸府徵鈔俱解南直隸蘇州諸府
河南山東浙江江西福建廣東湖廣徵鈔俱存解半

亦有折納布或鄉市之民米並兼納例不一十三年
令兩淮各場立倉囤歲以揚州蘇州嘉興三府屬附
近州縣及淮安倉并兌軍餘米內量撥收貯凡竈戶
除鹽送場每二百斤爲一引給米一石召商於開平
遠東甘肅諸處開中不拘資次給與兩浙運司及松
江嘉興二分司仁和許村諸場亦准此例十四年增
淮浙存積鹽爲四分景泰初增爲六分水鄉竈戶離
場三十里者一丁出米六石官收之滷丁代煎鹽納
官官給食用復以松江分司隸兩浙運司廢周忱法
民訟之願得忱提督不從止令推行忱法而已初廣

鹽不出境歲久積鹽商困率賄守閹吏越市廣西二
年巡撫葉盛以爲任之則廢法禁之則病商乃許計
鹽入米餉邊而後出境公私兩利天順元年都督僉
事季鐸冒他商守支常股鹽引奏支存積鹽越次占
利自是武臣多效之成化二年復南京官吏戶口食
鹽之半毋得踰十五口初以淮鹽缺暫停南京官吏
食鹽至是復舊舊例中鹽由戶部定則例出榜召商
無徑奏者是年富人呂銘等八人托勢要奏中兩淮
存積鹽五萬五千引出中旨允之尚書馬昂不能執
奏鹽法之壞自此始時豪勢多擾中商失利而儀真

瓜州武進南京衛所軍民造千料遮洋大船列械興
販乃爲重法私販窩隱俱論死家屬徙邊衛夾帶越
境者問充軍較景帝時加烈矣十七年清理河東鹽
課員外郎袁江言河東運司歲辦鹽課三十萬四千
引商未支者四百七十三萬八千餘引額設鹽戶計
一萬七千五百四十八丁丁歲辦鹽三十五引宜督
其倍辦又請以汝寧南陽二府行河東鹽陝西西安
府城內食河東鹽都布按三司官吏食鹽於靈州關
支宜改支河東帝從之初存積之間中也商人樂有
見鹽報中者爭至其後中納數多淮浙鹽不能給于

是配支長蘆山東十二三分道里隔越不能越支邊
商賈引近地富人自是有邊商內商之分邊商鹽既
不運獲內商引又不賤售報中寢怠存積之滯遂無
異於常股而淮浙鹽爲閹宦竊勢奏討患益劇成化
末年兩淮積欠已五十餘萬引迨孝宗即位始許糾
叅奏討者尚書李敏以勢家阻撓鹽法請簡風憲大
臣清理弘治二年乃命刑部侍郎彭韶清理浙江韶
奏蠲景泰四年以前逋課近者量折有差竈丁逋課
分年帶辦韶又言常股鹽課願中者少徵貯官倉積
欠消折請令竈戶引折銀三錢候商至給商赴場自

買自是有買補額鹽之例其不從經赦已無鹽課准
商人納價買補曰買補囚鹽災傷拖欠已經除豁亦
准商人補價買補曰買補定額場分底薄已經派撥
又在原商揀場買補曰揀場買補濫煎影販者日起
部上言總禾事一定場官欠課例比不謹若貪律一
請寬減竈丁鹽課及常股折價一請鹽場立預備倉
貯折贖米穀備賑貧竈一請寬恤總推一核竈丁詭
射優免著例一定病故代支年限又疏奏鹽場八圖
及詩竈丁煎贖罪鹽計小引一追銀二鐘命竈丁離
場三十里者納鹽價浙西引六錢浙東四錢五年八

月令兩淮等鹽運司鹽引悉于運司招商開中納銀
明初以來天下鹽課具于各邊開中上納粟菽商人
招民墾種築臺立堡自相保聚邊方粟菽無甚踴之
敵至是戶部尚書葉淇始變法令納銀類解戶部太
倉分俵各邊淇淮安人也入佑之說謂赴邊輸粟官
得直少商虞遠涉孰與增鹽估輸金運司利多以其
言奏聞內閣徐溥淇同年生贊成之引輸銀三四錢
有差計其得粟之直倍贏一時太倉之藏累至百餘
萬人以爲利然而赴邊開中之法廢近邊轉運不至
商屯撤業粟菽價湧貴邊儲三虛國帑日匱矣初制

商人屯田納粟易引行鹽總土一人故行如流水自葉淇變法納銀運庫解部發邊後又變淇法以引數派各邊土著備資納粟撤掣倉收總需內商獲利而土著傾家邊軍遂致枵腹令廣鹽得越境買衡州永州二府引納銀二分餘鹽納銀五分爲修建王府費工竣復初從湖廣巡撫請也弘治十五年至十八年未開中者每引上場徵銀一兩五錢中場一兩二錢下場九錢弘治十四年以前量減有差商人願代輸支鹽者減十之三其後各場銀數增減不一大略仿此時慶雲侯周壽壽寧侯張鶴齡各令家人奏買長

蘆兩淮鹽引尚書執奏不從商人譚景清等原奏內所無者並出中旨許之織造太監奏乞引鹽太學士劉健等力爭猶許支十分之五皇親駙馬公侯太監家人憑勢開中詭名包占者甚衆襄陵王食鹽自正統年始開支運司後各王援乞無已正德三年襄陵王奏先給千引弘治十四年以後止給三百引乞支如數部議王府食鹽無運司支給之例近日賜鹽千引者准襄陵例止支三百引乃先帝旨難更報可五年禁止內地中賣鹽課並禁奏開殘鹽俟邊乏中本色禁折銀初商人踴躍報中者定直既廉開中率於

秋成芻糧估賤鹽一引常獲二引之利赴令輻輳菽粟山峙自乞請詭冒者多又中不俟時故商賈不前正課耗屈嘉靖初乃括餘鹽之利以佐司農餘鹽各場竈丁課外所餘之鹽也景泰元年令餘鹽官爲收買計引給米淮鹽八斗浙長蘆以二斗遞減正德五年令缺鹽場分自相貿易初制正課引止納銀八分永樂中鹽一引輸邊粟二斗五升成化正德以還以次加重於是商人競爲夾帶官又不爲收買乃令商人納價增設引目商自納者引一兩開中者引八錢正鹽守支日久中者少餘鹽中多自餘鹽行存積之

法廢二十年帝以變亂鹽法由餘鹽勅罷之尚書李如圭言淮浙長蘆餘鹽係新增宜革去自二十一年始悉復舊法夾帶者割沒入官應變賣者以時估爲准御史吳瓊又請各邊中鹽者皆輸本色令甫下吏部尚書許讚請復開餘鹽以足邊用戶部覆議從之二十七年御史王國用議兩淮各場竈戶課外煎剩餘鹽扣留運司割沒鹽銀八萬二千兩每引官給竈戶銀二錢充工本增收鹽三十五萬引別名工本鹽商人每中額鹽二引帶中工本鹽一引抵庄兵年例十七萬六千兩有奇四十年雍正鹽一引許帶餘鹽

一引正邊報中上納糧草餘鹽在各邊司徵銀解部
先是立掣單法淮南一單爲引七萬三千歲定掣八
單淮北一單爲引五萬歲定掣四單計歲報掣引得
流通自驟益工本引日溢出單猝難銷言事者屢陳
工本爲鹽課贅疣戶部乃以國用方絀舍是年例無
所出卒因之江西故行淮鹽三十九萬引後南安贛
州吉安三府改行廣鹽惟南昌諸府仍行淮鹽二十
七萬引既而私販盛行袁州臨江瑞州三府則私食
廣鹽撫州建昌廣信三府則私食福鹽於是淮鹽僅
行十六萬引數年之間國計大絀巡撫馬森疏陳其

害請于峽江縣建橋設關扼廣福私販要津盡復淮
鹽稍增至四十七萬引未久橋毀除增額二十萬引
三十九年帝欲整頓鹽法戶部請如耿九疇王瓊黃
臣例遣大臣往吏部乃舉副都御史馮懋卿懋卿廩
嵩鄉人也嵩奏令總鹽利兩淮兩浙山東長蘆皆領
之關通苞苴無虛日懋卿言一正一餘兩淮長蘆山
東通例浙舊行小鹽引三百斤近行大鹽引四百斤
亦宜分正餘爲二各以二百八十斤爲率用收餘鹽
之利秤掣之法不得過五斤滾上舊時餘鹽額銀六
十一萬有奇自王國用開工本增至九十萬至是懋

卿復增至百萬半年一解又搜括四司殘鹽計得銀
幾二百萬一時矜爲奇功四十一年巡鹽御史徐爌
疏言祖宗朝兩淮鹽法曰常股曰存積曰水鄉共七
十萬引有奇引二百斤納銀八分永樂以後引納粟
二斗五升下場關支四散發賣商人之利亦十五焉
近年正鹽之外加以餘鹽餘鹽之外又加工本工本
不足乃有添單添單不足乃又添引懋卿趨利目前
不顧其後是誤國亂政之尤者議者徒以前歲不虧
遂指爲利臣伏見前歲所解非取諸商也預支下單
質典引目鬻產括借庫貯悉罄是可繼乎今災荒疊

告鹽場滄沒若欲取盈百萬必至逃亡竝急欲絕不
棘于此矣于是罷懋卿所增者南京御史林潤疏劾
懋卿贓罪帝命削籍爲民四十四年巡鹽御史朱炳
如始奏罷兩淮運司工本鹽其還司扣留割沒銀仍
令解部先是工本鹽行引鹽難掣邊商多乞掣河鹽
河鹽者謂其在河徑自起掣不上廩困商喜其易支
而獲利疾賣緣爲奸工本旣罷掣河鹽如故湖廣江
西舊全食淮鹽後因兩廣用兵設立鹽廠廣西於梧
州許行衡州永州二府廣東於潮州南雄許行江西
南安贛州二府後增袁州吉安臨江三府袁臨旋罷

惟南贛吉衡永五府食廣鹽後改行淮鹽民稱不便
乃復行廣鹽工本鹽既罷扣留餘鹽銀無見貯乃議
於正鹽外每引附帶餘鹽二十斤淮南八單淮北四
單以抵工本之數隆慶元年巡按直隸御史蘇朝奏
停附帶二年總理屯鹽都御史龐尚鵬疏陳鹽法其
疏通壅滯則曰引目先因加增工本鹽停壅淮南歲
掣八單單七萬三千引今議加爲八萬五千引淮北
四單單五萬引今議加爲五萬五千引計歲加引總
一十一萬六千有奇此外併宜查復嘉靖初別行小
鹽事餉每引止四百八十五斤不得過多堆鹽掣盡

始換掣淮南納餘鹽銀五錢二分五釐淮北三錢七分三釐通計每單淮南增爲十萬四千引淮北增爲七萬引歲多銷總三十二萬八千引疏通之法莫要於此餘鹽引尚虧二萬五千七百六十兩於割沒銀內補之可不失六七十萬原額其禁私販則曰私販盛行由餘鹽不售宜於正鹽及商賈餘鹽外官爲收買又淮南鹽出於煎燒必資盤鐵淮北鹽出於攤曬必藉埤池盤鐵埤池原有定額自嘉靖三十年奸商牟利告改盤鐵開場揚州鑄造鍋鐵於是人得置鍋開場禁之便其去專利偏累則曰邊商報中內商守

支事本相須但內商安坐邊商遠輸勞佚不均故掣河鹽者以惠邊商也然河鹽既行堆鹽必滯內商無所得利則邊商之引不售今宜停掣河鹽但別邊商引價見引起紙關引到司勘合爲三等內商無新引者不得掣自無所留難河鹽停則堆鹽速引價定則開中多又正餘鹽斤數外多帶者謂之割沒斤納銀一分今積算累罪過重宜省疏論二十餘事多所興革帝皆從之陝西延安府舊屬河東行鹽地改行池鹽明年巡按御史蘇士涓奏行殘鹽令均配派支期六年而盡又言鹽鈔諸稅各運司皆無長蘆獨有之歲

徵不過百餘兩宜罷勿徵十六年改襄城一縣仍食
河東鹽長蘆鹽行開封府隸祥符等二十三州縣山
東鹽行歸德府屬九縣及開封府屬儀封等五縣二
運司分河東額課銀四萬八千兩引日給票二十五
年兵部車駕司主事徐中素言永樂中商人輪邊粟
中鹽爭出財力募民墾荒天順中斗粟值銀二分邊
儲大裕自葉淇議改折色商徙農散田盡汙菜後雖
有仍徵米豆芻秣之令不過十之一二商人寧厚值
易粟無肯墾田以多費者令誠沛明旨漸復輸粟之
規不十年而舊制可舉疏入留中明年直隸巡按御

史畢三才言長蘆額鹽一十八萬八千引有奇今倍之宜裁小票行鹽非法限蘆鹽六百四十斤東鹽六百一十六斤禁溢額是年始命內監魯保駕兩淮沒官餘鹽從市僧田應璽奏也初制七分常股每歲開中餉主兵三分存積遇倣開中餉客兵後因各邊多故二項並開淮額歲課七十萬五千一百八十引又增各邊新引日歲不下二十萬又以大工搜遠年餘沒廢引六十餘萬胥出額課之外無正鹽止令商買補蓋餘鹽久盡惟計引重科加煎飛派而已當是時兩淮引價餘銀一百二十餘萬增至一百四十五萬

新引日益正引日墜上年千戶尹英請按季搭賣沒官鹽引可得銀六萬兩大學士張位等爭之至是又以應璧奏命保出保議開存積廢引加罰八萬引奸人董璉百戶吳應麒高時夏等爭言鹽利而山西福建諸處稅監皆領鹽課鹽法之壞自河鹽始以其起掣也兩淮新增邊引與保所開存積八萬引名雖不同實皆河鹽名存積實補買也高時夏奏浙江福建餘鹽歲可變價三十萬兩浙江巡按查勘皆罔因言浙江正課歲額止一十四萬今餘鹽乃至一十五萬即以正課全進尚虧一萬也疏入不省于是福建議

解一萬三千兩有奇浙江議解一萬六千兩復加至
三萬七千兩有奇是時竈戶蕩田多爲奸豪私墾畝
升租三釐或墾二報一官吏多聽之三十四年御史
喬應甲言鹽依于竈竈依于場場之旣去草從何生
草旣不生鹽從何出事下所司尚書趙世卿言引課
未有停壓一年者自魯保存積始掣引未有附搭超
掣者亦自存積奸商始兩淮自助工而解遂愆期且
損額矣福建自開依山引而額遂不敷且壓至次年
矣請將無名浮課悉行罷免兵部蕭大亨言浮引行
則正引滯課銀借解于八年之前而商鹽掣支於八

年之後前銀未償而後課又迫商困至此極矣陝西
巡撫徐宗瀛言官鹽之弊於浮引邊商之困於掣支
已非一日萬曆二十六七年以後浮引盛行掣支亦
頗談者方咎魯保而保以爲虧課之根本不在存積
之壅滯而在京掣之耽遲舊例每歲兩掣每掣四單
後因浮課混淆改於八月一掣每掣四單又以鹽臣
久缺延十八月一掣計誤掣二年則壅十二單矣必
定京掣正單計八月一掣四單引照舊例重五百七
十五斤蓋保之意以京掣通其正引以浮引銷其餘
鹽爲目前近計耳而邊商所苦正在於小票奸商隨

時納給小票則正引坐廢陳性學議曰邊引重二百斤加納餘鹽始重五百五十斤堆積三年換單順序例也今以小票發賣不隨鹽單每包重至二千五百斤給以小票江浙吳楚何所不之帝亦深知其弊焉自保乞開存積引鹽謂歲可得銀十二萬比引項繁重督促不前商亡僉民擾不勝言三十四年夏至明年春逋正額至一百餘萬保亦惶懼請罷存積引鹽未久保死有旨罷三十六年以後存積課暨餘鹽銀三十七年並罷長蘆換單鹽稅銀又以河東鹽臣陳于廷言悉改票爲引三十八年改鳳翔府食靈州鹽

四十年給事中歸子顧請罷遣內監四十二年李太
后遺詔蠲各運司浮課長蘆稅監張業不奉詔後二
年御史牟志夔言始罷兩浙鹽臣楊鶴題蠲復入劉
成言第減三之一時行鹽中引者曰邊商支掣者曰
內商運賣者曰水商兩准于三商外別有國戶阻壞
鹽法由國戶三商盡困於是巡鹽御史龍遇奇奏立
鹽政綱法淮南編爲十綱淮北十四綱淮南舊引二
百萬一綱歲定現行引二十萬別立附字綱帶行積
引一萬七千計十年舊引可盡淮北舊引一百四十
萬初十年一綱定七萬次三年十綱二十一萬末一

年以所餘七千併積引附行之計十四年舊引可盡
帝是之降自天啓搜括靡有遺利科道郭興治崔呈
秀實始建議曰補庫折價曰積引食鹽曰南北綱割
沒曰新舊引食鹽割沒曰積鈔關引曰積引上納餘
銀曰加帶納餉銀曰歸舞陽行蘆鹽各計所入不資
初御史吳之仁疏請添單及是給事中周汝謨復爲
增課之說侍郎董應舉陳鋪綱立綱利害謂補行積
引名曰鋪綱其害六不待積引名曰立綱其利六六
年詔兩淮邊引積引量增銀八分助工巡鹽御史疏
言自立綱法以來鹽斤視昔不啻減十之三鹽課視

昔不啻加十之三循此不變商已難支今又不諭新舊加銀八分絕流而漁勢將無魚請比寧夏加餉每引五分帶鹽十斤近日加銀一錢亦帶鹽十斤折衷之加銀八分與帶鹽十三斤章下所司時屢詔革票既引票商屢撓之引商願割引代票行鹽收票地以銷壅引然票鹽之弊終不改崇禎中給事中黃承昊條上鹽政一曰折價一曰減斤一曰加課折價者祖制鹽商輸粟以給邊戍令竈戶煎鹽上官倉以供商支引支二百五斤後因倉鹽消折於是令竈戶引折價三錢貯庫邊商至給銀令自買場鹽名曰倉鹽折

價既邊商苦遠涉以納糧倉鈔並倉鹽折價買之內
商今支領行鹽折價故內商所應得比因內商貧乏
屢借運庫存銀抵解京歲課未補鹽臣龍遇奇以折
價當之歲約七萬兩補完之後仍令商支又因乏邊
餉復以折價入加增遠餉歸官鹽斤之制兩淮引五
百七十斤後因積引難消袁世振始創減斤之法以
四百三十斤爲一引多出引窩以銷積引遠難方殷
積引未銷折價鹽斤難復舊制大工加課係額外御
極後復以陵工未除加各運司鹽課銀一十四萬餘
兩引課累有增加竈丁辦鹽向有工本鈔當日估直

二貫五百文當銀二兩五錢自鈔法壞正統間俾商
輸米麥協濟貧窶曰勸借引給一石景泰初猶給八
斗成化弘治時減爲銀五分沿至崇禎時計一丁歲
辦二十引僅得銀一兩不抵明初一引之值矣